

氏族典第二百三十五卷

張姓部列傳三

魏 張範弟承 昭

按魏志張範傳範字公儀河內修武人也祖父歆爲漢司徒父延爲太尉太傅袁隗欲以女妻範範辭不受性恬靜樂道忽於榮利徵命無所就弟承字公先亦知名以方正徵拜議郎遷伊闕都尉董卓作亂承欲合徒衆與天下共誅卓承弟昭時爲議郎適從長安來謂承曰卓阻兵而無義固不能久不若擇所歸附待時而動承然之乃解印綬與範避地揚州袁術備禮招請範稱疾不往遣承與相見術問曰孤以土地之廣士民之衆欲擬迹高祖何如承對曰在德不在強術不悅承去之太祖平冀州遣使迎範範以疾留彭城遣承詣太祖太祖表以爲諫議大夫太祖自荊州還範得見於陳以爲議郎參丞相軍事甚見敬重範救恤窮乏家無所餘贈遺無所逆亦終不用及去皆以還之建安十七年卒魏國初建承以丞相參軍祭酒領趙郡太守政化大行太祖將西征徵承參軍事至長安病卒

張遼

按魏志張遼傳遼字文遠鴈門馬邑人也本聶壹之後以避怨變姓少爲郡吏漢末并州刺史丁原以遼武力過人召爲從事使將兵詣京都何進遣詣河北募兵得千餘人還進敗以兵屬董卓卓敗屬呂布遷騎都尉布爲李傕所敗從布東奔徐州領魯相時年二十八太祖破呂布於下邳遼將其衆降拜中郎將賜爵關內侯數有戰功遷裨將軍袁紹破別遣遼定魯國諸縣與夏侯淵圍昌豸於東海遼爲說太祖神武豸喜隨詣太祖從討袁譚袁尙於黎陽有功復從攻鄴鄴破遼別徇趙國常山招降緣山諸賊還太祖自出迎遼引共載以爲盪寇將軍時荊州未定復遣遼屯長社陳蘭梅成以氐六縣叛其衆轉入潯山潯中有天柱山高峻二十餘里道險狹遼進到山下攻之盡擄其衆太祖論諸將功曰登天山履峻險以取蘭成盪寇功也太祖征孫權遣使遼與樂進李典等將七千餘人屯合肥孫權至遼夜募敢從之士得八百人先登陷陣大呼自名衝壘入至權麾下權大驚見遼衆少乃聚圍數重遼直前急擊將麾下數十人出復還突圍拔出餘衆權人馬皆披靡無敢當者太祖大壯遼拜征東將軍文帝卽王位轉前將軍分封兄汎及一子列侯還屯合肥進爵都鄉侯文帝

踐阼封晉陽侯黃初二年遼朝洛陽宮文帝親問破吳狀還屯雍丘孫權叛帝遣遼乘舟至海陵臨江權甚憚焉是歲遼與諸將破權將呂範病篤薨於江都諡曰剛侯子虎嗣薨子統嗣

張郃

按魏志張郃傳郃字雋父河間鄭人也漢末應募討黃巾爲軍司馬屬韓馥馥敗以兵歸袁紹紹使拒公孫瓚瓚破郃功多太祖與袁紹相拒於官渡紹遣將淳于瓊等督運屯烏巢太祖自將急擊郃說紹引兵救之郭圖曰郃計非也紹軍潰圖慙又更譖郃郃懼乃歸太祖拜偏將軍封都亭侯後討柳城與張遼俱爲軍鋒以功遷平狄將軍太祖征張魯從散關入漢中先遣郃督步卒五千通路魯降太祖還留郃與夏侯淵等守漢中拒劉備郃別督諸軍降巴東巴西二郡進軍宕渠爲備將張飛所拒引還南鄭拜盪寇將軍文帝卽王位以郃爲左將軍進爵都鄉侯及踐阼進封鄭侯明帝卽位遣南屯荊州與司馬宣王擊孫權諸葛亮出祁山加郃位特進遣督諸軍拒亮將馬謖於街亭破之亮復出急攻陳倉帝驛召郃到京自幸河南城置酒送郃郃晨夜進至南鄭亮退拜征西車騎將軍郃識變數警慮營陣料戰勢地形無不如計諸葛亮復出祁山詔郃督諸將西至略陽亮還郃追至

木門與亮軍交戰飛矢中右膝薨諡曰壯侯子雄嗣

張既

按魏志張既傳既字德容馮翊高陵人也年十六爲郡小吏後歷右職舉孝廉不行太祖爲司空辟未至舉茂材除新豐令治爲三輔第一袁尙拒太祖於黎陽遣郭援高幹與關中諸將合從既說馬騰等擊幹援大破之其後張晟衛固張琰起兵太祖以既爲議郎西徵馬騰等引兵擊破之封既武始亭侯騰子超反既從太祖破超於華陰西定關右以既爲京兆尹魏國建爲尙書出爲雍州刺史太祖謂既曰還君本州可謂衣繡畫行矣張魯降既說太祖拔漢中民以實長安文帝卽王位置涼州以鄒岐爲刺史涼州反帝曰非既莫能安涼州乃召鄒岐以既代之既至進擊大破之帝悅徙封西鄉侯既臨二州十餘年政惠著聞黃初四年薨明帝卽位追諡曰肅侯

張苞

按魏志滿寵傳寵守高平令縣人張苞爲郡督郵貪穢受取干亂吏政寵因其來在傳舍率吏卒出收之

張楊

按魏志張楊傳楊字稚叔雲中人也以武勇給并州爲武猛從事靈帝末天下亂帝以所寵小黃門蹇碩爲西園上軍校尉軍京都欲以禦四方徵天下豪傑以爲偏裨太祖及袁紹等皆爲校尉屬之并州刺史丁原遣楊將兵詣碩爲假司馬靈帝崩碩爲何進所殺楊復爲進所遣歸本州募兵得千餘人因留上黨擊山賊進敗董卓作亂楊遂以所將攻上黨太守於靈關不下略諸縣衆至數千人山東兵起欲誅卓袁紹至河內楊與紹合復與匈奴單于於夫羅屯漳水單于欲叛紹楊不從單于執楊與俱去紹使將麴義追擊於鄴南破之單于執楊至黎陽攻破渡遼將軍耿祉軍衆復振卓以楊爲建議將軍河內太守天子之在河東楊將兵至安邑拜安國將軍封晉陽侯楊欲迎天子還洛諸將不聽楊還野王建安元年楊奉董承韓暹挾天子還舊京糧乏楊以糧迎道路遂至洛陽謂諸將曰天子當與天下共之幸有公卿大臣楊當捍外難何事京都遂還野王卽拜爲大司馬楊素與呂布善太祖之圍布楊欲救之不能乃出兵東市遙爲之勢其將楊醜殺楊以應太祖

張燕

按魏志張燕傳燕常山真定人也本姓褚黃巾起燕合聚少年爲羣盜在山澤間轉攻還真定衆萬餘人博陵張牛角亦起衆自號將兵從事與燕合燕推牛角爲帥俱攻廩陶牛角爲飛矢所中被創且死令衆奉燕告曰必以燕爲帥牛角死衆奉燕故改姓張燕剽捍捷速過人故軍中號曰飛燕其後人衆浸廣常山趙郡中山上黨河內諸山谷皆相通其小帥孫輕王當等各以部衆從燕衆至百萬號曰黑山靈帝不能征河北諸郡被其害燕遣人至京都乞降拜燕平難中郎將是後董卓遷天子於長安天下兵數起燕遂以其衆與豪傑相結袁紹與公孫瓚爭冀州燕遣將杜長等助瓚與紹戰爲紹所敗人衆稍散太祖將定冀州燕遣使求佐王師拜平北將軍率衆詣鄴封安國亭侯邑五百戶燕薨子方嗣方薨子融嗣

張繡

按魏志張繡傳繡武威祖厲人驃騎將軍濟族子也邊章韓遂爲亂涼州金城鞠勝襲殺祖厲長劉雋繡爲縣吏聞伺殺勝郡內義之遂招合少年爲邑中豪傑董卓敗濟與李傕等擊呂布爲卓報仇繡隨濟以軍功稍遷至建忠將軍封宣威侯濟屯弘農士卒饑餓南攻穰爲流矢所中死繡領其衆

屯宛與劉表合太祖南征軍清水繡等舉衆降太祖納濟妻繡恨之太祖聞其不悅密有殺繡之計計漏繡掩襲太祖太祖軍敗二子沒繡還保穰太祖比年攻之不克太祖拒袁紹於官渡繡從賈詡計復以衆降繡至太祖執其手與歡宴爲子均取繡女拜揚武將軍官渡之役繡力戰有功遷破羌將軍從破袁譚於南皮復增邑凡二千戶從征烏桓於柳城未至薨諡曰定侯子泉嗣坐與魏諷謀反誅國除

張魯

按魏志張魯傳魯字公祺沛國豐人也祖父陵客蜀學道鶴鳴山中造作道書以惑百姓從受道者出五斗米故世號米賊陵死子衡行其道衡死魯復行之益州牧劉焉以魯爲督義司馬與別部司馬張脩將兵擊漢中太守蘇固魯遂襲脩殺之奪其衆焉死子璋代立以魯不順盡殺魯母家室魯遂據漢中以鬼道教民自號師君其來學者初皆名鬼卒受本道已信號祭酒各領部衆多者爲治頭大祭酒不置長吏皆以祭酒爲治民裔便樂之雄據巴漢垂三十年漢末力不能征遂就寵魯爲鎮民中郎將領漢寧太守通貢獻而已民有地中得玉印者羣下欲尊魯爲漢寧王魯功曹巴西閭

圍諫魯不稱魯從之韓遂馬超之亂關西民從子午谷奔之者數萬家建安二十年太祖乃自散關出武都征之至陽平關魯欲舉漢中降其弟衛不肯率衆數萬人拒關堅守太祖攻破之遂入蜀奔南山入巴中左右欲悉燒寶貨倉庫魯曰本欲歸命國家而意未達今之走避銳鋒非有惡意寶貨倉庫國家之有遂封藏而去太祖入南鄭甚嘉之又以魯本有善意遣人慰喻魯盡將家出太祖逆拜魯鎮南將軍待以客禮封閬中侯邑萬戶封魯五子及閭圍等皆爲列侯爲子彭祖取魯女魯薨諡之曰原侯子富嗣

張邈

按魏志張邈傳邈字孟卓東平壽張人也少以俠聞振窮救急傾家無愛士多歸之太祖袁紹皆與邈友辟公府以高第拜騎都尉遷陳留太守董卓之亂太祖與邈首舉義兵汴水之戰邈遣衛茲將兵隨太祖袁紹旣爲盟主有驕矜色邈正義責紹紹使太祖殺邈太祖不聽邈知之益德太祖太祖之征陶謙勅家曰我若不還往依孟卓後還見邈垂泣相對其親如此呂布之捨袁紹從張楊也過邈臨別把手共誓紹聞之大恨邈畏太祖終爲紹擊已也心不自安興平元年太祖復征謙邈弟超

與陳宮等謀叛太祖宮說邈迎布爲兗州牧據濮陽郡太祖還擊破布於鉅野布東奔劉備邈詣袁術請救未至自爲其兵所殺

張超

按魏志張邈傳太祖征陶謙邈弟超與陳宮等謀叛太祖宮說邈迎布爲兗州牧太祖還擊破布於鉅野布東奔劉備邈從布留超將家屬屯雍丘太祖攻圍數月屠之斬超及其家

張勳

按魏志張邈傳呂布襲取下邳自稱徐州刺史袁術遣大將張勳攻布布擊之勳大破敗

張晟

按魏志張旣傳河內張晟衆萬餘寇潁川間太祖以旣爲議郎使西徵諸將馬騰等引兵擊破之

張琰

按魏志張旣傳張晟寇潁川農張琰起兵以應之太祖以旣爲議郎使西徵諸將馬騰等引兵擊破之斬琰首

張恭弟華子就

按魏志閭溫傳先是河右擾亂隔絕不通燉煌太守馬艾卒官府又無丞功曹張恭素有學行郡人推行長史事乃遣子就東詣太祖請太守時酒泉黃華張掖張進各據其郡欲與恭艾并勢就至酒泉爲華所拘執刼以白刃就終不回私與恭疏曰大人率厲燉煌忠義顯然豈以就在困厄之中而替之哉恭卽遣從弟華攻酒泉別遣鐵騎二百東緣酒泉北塞徑出張掖北河迎太守尹奉於是張進須黃華之助華顧恭兵恐擊其後遂詣金城太守蘇則降就竟平安黃初二年下詔褒揚賜恭爵關內侯太和中卒贈執金吾就後爲金城太守父子著稱於西州

張琚

按魏志管寧傳鉅鹿張琚字子明少游太學學兼內外後歸鄉里袁紹前後辟命不應移居上黨并州牧高幹表除樂平令不就遁徙常山門徒且數百人遷居任縣太祖爲丞相辟不詣太和中詔求隱學之士能消災復異者郡累上琚發遣老病不行廣平太守盧毓到官三日綱紀白承前致版謁琚毓教曰張先生所謂上不事天子下不友諸侯者也豈此版謁所可光飾哉但遣主簿奉書致羊

酒之禮青龍四年辛亥詔書張掖郡元川溢涌激波奮蕩寶石負圖狀像靈龜宅於川西巖然磐峙倉質素章麟鳳龍馬煥炳成形文字告命粲然著明太史令高堂隆上言古皇聖帝所未嘗蒙實有魏之禎命東序之世實事班天下任令于綽連齋以問琚琚密謂綽曰夫神以知來不追已往禎祥先見而後廢興從之漢已久亡魏已得之何所追興徵祥乎此石當今之變異而將來之禎瑞也正始元年戴鴛之鳥巢琚門陰琚告門人曰夫戴鴛陽鳥而巢門陰此凶祥也乃援琴歌詠作詩二篇旬日而卒時年一百五歲

張進

按魏志張既傳文帝卽王位置涼州以鄒岐爲刺史張掖張進執郡守舉兵拒岐

張緝

按魏志張既傳既子緝以中書郎稍遷東莞太守嘉平中女爲皇后徵拜光祿大夫位特進妻向爲安成鄉君緝與中書令李豐同謀誅

張翁歸

按魏志張既傳既小子翁歸爵關內侯

張晏

按尙友錄晏字子傳中山人所著有西漢書音釋四十卷

吳 張昭

按吳志張昭傳昭字子布彭城人也少好學善隸書從白侯子安受左氏春秋博覽衆書與琅邪趙昱東海王朗俱發名友善弱冠察孝廉不就與朗共論舊君諱事州里才士陳琳等皆稱善之漢末大亂徐方士民多避難揚土昭南渡江孫策創業命昭爲長史撫軍中郎將升堂拜母如比肩之舊文武之事一以委昭策臨亡以弟權託昭昭率羣僚立而輔之上表漢室下移屬城中外將校各令奉職權悲感未視事昭身自扶權上馬陳兵而出然後衆心知有所歸昭復爲權長史授任如前後拜綏遠將軍封由拳侯初權當置丞相衆議歸昭權曰方今多事職統者責重非所以優之也乃用顧雍權既稱尊號昭以老病上還官位及所統領更拜輔吳將軍班亞三司改封婁侯食邑萬戶在里宅無事乃著春秋左氏傳解及論語注昭每朝見辭氣壯厲義形於色曾以直言逆旨中不進見

後蜀使來稱蜀德美而羣臣莫拒權嘆曰使張公在坐彼不折自廢安復自誇乎權以公孫淵稱藩遣張彌許晏至遼東拜淵爲燕王昭諫曰淵背魏懼討遠來求援非本志也若淵改圖欲自明於魏兩使不反不亦取笑於天下乎權與相反覆昭意彌切權不能堪案刀而怒昭熟視權因涕泣橫流權擲刀致地與昭對泣然卒遣彌晏往昭稱疾不朝權恨之土塞其門昭又於內以土封之淵果殺彌晏權數慰謝昭昭不得已然後朝會昭容貌矜嚴有威風權常曰孤與張公言不敢妄也舉邦憚之年八十一嘉禾五年卒諡曰文侯

張紘

按吳志張紘傳紘字子綱廣陵人少游學京都還本郡舉茂才公府辟皆不就避難江東孫策創業遂委質焉表爲正議校尉從討丹陽策身臨行張紘諫曰夫主將乃籌謀之所自出三軍之所繫命也不宜輕脫建安四年策遣紘奉章至許宮留爲侍御史少府孔融等皆與親善曹公聞策薨欲因喪伐吳紘諫曹公從其言卽表權爲討鹵將軍領會稽太守曹公欲令紘輔權內附出紘爲會稽東部都尉後權以紘爲長史從征合肥權率輕騎將往突敵紘諫權納紘言而止旣還明年將復出軍

紘又諫遂止不行紘建計宜出都秣陵權從之令還吳迎家道病卒年六十紘著詩賦銘誄十餘篇

張溫
弟祗白

按吳志張溫傳溫字惠恕吳郡吳人也父允以輕財重士名顯州郡爲孫權東曹掾卒溫少修節操容貌奇偉權聞之以問公卿曰溫當今與誰爲比大司農劉基曰可與全綜爲輩太常顧雍曰基未詳其爲人也溫當今無輩權曰如是張允不死也徵到延見文辭占對觀者傾竦權改容加禮罷出張昭執其手曰老夫託意君宜明之拜議郎選曹尙書徙太子太傅甚見信重時年三十二以輔議中郎將使蜀蜀甚貴其才還頃之使入豫章部伍出兵事業未究權旣陰銜溫稱美蜀政又嫌其聲名大盛衆庶炫惑恐終不爲己用思有以中傷之會暨豔事起遂因此發舉斥還本郡後六年溫病卒二弟祗白亦有才名與溫俱廢

張彌

按吳志張昭傳權以公孫淵稱藩遣張彌許晏至遼東拜淵爲燕王昭諫曰淵背魏懼討遠來求援非本志也若淵改圖欲自明於魏兩使不反不亦取笑於天下乎權與相反覆卒遣彌晏往淵果殺

彌曼

張惇

按吳錄惇字叔方吳郡人也德量淵懿清虛淡泊又善文辭孫權以爲車騎將軍出補海昏令

張儼

按文士傳張儼朱異張純三人共詣驃騎將軍朱據據聞三人才名各爲賦然後乃坐純乃賦席曰席爲冬設簟爲夏施揖讓而坐君子攸宜

張純

按文士傳吳郡張純少有令名嘗謁鎮南將軍朱據據令賦三物然後坐純應聲便成文不加點

張舉

按尚友錄舉仕吳爲句章令民有妻殺夫因放火燒舍詐稱夫死於火夫家疑而訴官妻拒不承舉以豬二口一殺之一活之乃積薪燒之察殺者口中無灰活者口中有灰遂驗其夫口中果無灰鞫之其妻服罪人以爲神明

張秉

按萬姓統譜秉字仲節陽羨人時顧劬號知人一見遂友之劬爲豫章太守發在近路值秉病時送者百數劬辭曰張仲節以病不克來恨不見之暫還與別諸君幸少時相待秉自是聲譽遠播仕吳至雲陽太守

張承

按吳志張昭傳昭長子承字仲嗣少以才學知名與諸葛瑾步騭嚴峻相友善權爲驃騎將軍辟西曹掾出爲長沙西部都尉討平山寇得精兵萬五千人後爲濡須都督奮威將軍封都鄉侯承爲人壯毅忠讜能甄識人物諸葛恪年少時衆人奇其英才承言終敗諸葛氏者元遜也勤於長進篤於物類凡在庶幾之流無不造門年六十七赤烏七年卒諡曰定侯子震嗣

張休

按吳志張昭傳昭子休字叔嗣弱冠與諸葛恪顧譚等俱爲太子登僚友以漢書授登從中庶子轉爲右弼都尉權嘗游獵追暮乃歸休上疏諫戒權大善之以示於昭及登卒後爲侍中拜羽林都督